

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipindar aviye vahe ñehesa Jesucristo, Tūpa Rahir, recocuer resendar amombehu potami pëu.

² Yipiindar Tūpa aipo ehi imombehu oñehe mombehusar Isaías rembicuachía pìpe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipĩrata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Ëgüe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tūpa upe, ahese opoãpiramora Tūpa pëu ñero ãgua pe angaipa rese” ehi ava upe.

⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pìpe.

⁶ Juan turucuar camello ragüer apopri, sumbicuasa mbahe pìrer, sembihi evocoiyase tucru, eiri caha pìpendar avei.

⁷ Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora ãgua.

⁸ Che supi eté opoãpiramo i pipe tēi; ahe rumo pe ãpiramora Espíritu Santo pipe” ehi.

Jesús ãpiramo agüer

⁹ Ipare Jesús osē tecua Nazaret sui oso Galilea rupi. Aheve Juan oñapiramo iai Jordán pipe.

¹⁰ Osē ramoseve i sui, Jesús osepia i va oyemboi tupri, ahese Espíritu ogüeyi iharive apicasu nungar.

¹¹ Ahese oyeendu ñehesa i va sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espíritu Santo viroguata Jesús ava porēhisa rupi.

¹³ Aheve Jesús secoi cuarenta arí mbahe mimba vai pãhuve. Aheve avei Carugar osecõãha; Tũpa rembiguai i va pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico

¹⁵ aipo ehi: “Oyepota arí iyavei cõimi eté Tũpa mborerecuasa yandeu. Sese, pemboasi pe angaipa, peyevi Tũpa upe, iyavei peroya co ñehesa aviye vahe Tũpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepi arí Jesús oguata i pa Galilea ivi. Ahese osepia Simón, tivri Andrés avei, ahe pira omboha yuvireco.

17 Ahese Jesús aipo ehi chupe:

—Pe pira recasar peico, perio che rupi, na peye aveira ava reca água cheu nara —ehi.

18 Aipo he ramosave voi, opoi opira mbohasa sui yuvireco, yuviraso supi.

19 Ipare chĩhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

20 Ahe chupe avei: “Perio che rupi” ehi, evocoyase vu oseyá carite pipe ipĩtivĩsar reseve, yuviraso supi.

Mbia caruguar vireco vahe oyese

21 Oyepotase tecua Capernaum ve yuvireco mbituhusa ari pipe, Jesús oi que oporombohe tũparove.

22 Evocoyase ava osenduse iporombohesa, “¿Mara ehi rutei?” ehi tẽi yuvireco chupe. Esepia, ahe oporombohe güeco pĩratasa pipe, ndahei Moisés porocuita rese oporombohe vahe nungar.

23 Aheve mbia ahe tecua pendar vireco vahe caruguar oyese, oñehe pĩrata chupe aipo ehi:

24 —¿Mahera vo ereyuño tẽi cohava oreu, Jesús Nazaret pendar? ¿Ereyu vo ore mocañi água tẽi? Che orocua ité, nde Tũpa suindar ndaseco marai vahe ereico —ehi chupe.

25 Oñehe pĩrata rumo caruguar upe aipo ehi: — ¡Quiriri, esẽ co mbia sui! —ehi chupe.

26 Evocoyase caruguar mbia rese secoi vahe omoehoha seiti ivive, sãse, osẽ oso ichui.

27 Opacatu ava ombosiquiye, ichui oporandurandu oyeupe yuvireco aipo ehi:

—¿Mbahe pĩha co? ¡Iporombohesa ipiasu vahe ité!
¡Co mbia vireco ité omborerecuasa! ¡Carugar avei
eté omboyeroya oyeupe ñehese! —ehi tēi ava
yuvireco.

²⁸ Cũriteimi voi yandusa serãcua opacatu ivi
Galilea rupi.

Jesús ombogüera Pedro rembireco si

²⁹ Jesús yuvinosese tũparo sui, yuviraso Santi-
ago, Juan rese Simón, Andrés rētave.

³⁰ Aheve Simón rembireco si sohí iteanga vu-
pave ou. Evocoyase omombehu Jesús upe imba-
herasisa yuvireco.

³¹ Ahese oso chupe oipisi ipo rese imopuha, ahe
ramoseve, sohí opituhu ichui. Ipare voi ahe cuña
ihañeco semihura rese.

Jesús setá ombogüera ava imbaheasi vahe

³² Pĩtu ramosé opacatu imbaheasi vahe iyavei
carugar vireco vahe viraso yuvireco chupe im-
bogüera ãgua.

³³ Opacatu ava ahe tecua pendar oñemonuha
oquendipive yuvireco.

³⁴ Evocoyase setá ombogüera mbaherasi-rasi tēi
vireco vahe, iyavei omboyepipi setá carugar ava
sui. Ndoipotai rumo carugar ñehé. Esepia, ahe
oicua ité evocoyase seco yuvireco.

*Jesús Vu Tũpa Ñehengagüer omombehu judío tũparo
rupi*

³⁵ Ayihiteve Jesús oñarapuha oso ava porēhisave
oyeroqui ãgua.

³⁶ Evocoyase Simón ondugüer reseve yuviraso
seca.

³⁷ Osepia,

—Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu ãgua aheve; evocoi nungar apo ãgua niha che ayu —ehi.

³⁹ Êgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūritei! —ehi chupe.

⁴² Aipo ihe ramoseve, ocuera voi eté.

⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porrecosa nde cuerasa re-sendar Moisés porocuaíta rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique ãgua güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepei ari pipe Jesús oyevi ou tecua Capernaum ve, ahese opacatu oyandu ñepei oive secoise yuvireco.

² Cũriteimi voi eté setá ava oñemonuha yuvireco secosave. Sese ndipoi eté ava reique iri ãgua oi pipe oquendipi rupi. Ahe rumo omombehuño ité Vu Ñehengagüer.

³ Aheseve irungatu mbia viroyepota ndoguatai vahe yuvireco chupe.

⁴ Ahe rumo ndiyai seroique ãgua Jesús uve ava rehısave yuvireco. Sese viroyeupi oi harıve seraso yuvireco. Aheve teca virocua oi sui yuvireco; supı viroyı supa reseve imondo Jesús rovai tuprı yuvireco.

⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahır, che ñero nde angaipa rese ndeu — ehi.

⁶ Moisés porocuita rese oporombohe vahe rumo ipihañemoñeta aheve yuvinoi:

⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tũpa ñehe nungar pipe tēi oñehe. Tũpaño ité niha oicatu ava angaipa upe oñeroi ãgua” ehi.

⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese?

⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pıha, anise: “Eñarapuha, esupi nde rupa, eguata” hesa tie?

¹⁰ Tapeicua ru che, Ava Rıquehir, areco mborerecuasa co ivı pipe ava angaipa upe che ñero ãgua

—ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiaí vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivii. Aheve oporombohe oyese ava rehii yemboyase.

¹⁴ Ichui oguata vitesse, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuasar iyavei ava yangaipa vahe pāhuve. Esepia, setá ava osaquicue moñaño ité yuvireco.

¹⁶ Evocoyase Jesús ocaruse ipāhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

18 Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

19 Evocoyase omboyeví ahe ava upe:

—¡Ndiyai eté ichohopri mendasave iyecuacu ãgua imer oicove vitese ipãhuve!

20 Oimera rumo ari imer reraso ãgua ichui curi, ahese ramo oyecuacura yuvireco cute —ehi.

21 “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité.

22 Iyavei uva ricuer ipiasu vahe ndiyai iñasa mbahe pিরer cuacua pipe. Esepia, uva ricuer ipiasu vahe osose mbahe pিরer cuacua vahe pipe, ombopuñora, uva ricuer evocoyase ocañipa tẽira, iyavei mbahe pিরer ocañi tẽi aveira. Sese uva ricuer ipiasu vahe ñoñasara mbahe pিরer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

23 Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipohopoho sãhi yuvireco.

24 Evocoyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe.

²⁶ Pahi rerecuar ivate catu vahe Abiatar serer vahe recose, ahese David oi que Tüpa rêta pipe pan imboeteipri Tüpa upendar reca ondugüer reseve yuvirohu ãgua. Ahe chupe acoi ndipotasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oi que iri judío tūparove. Aheve oime mbia ipo co cotigüer nomii vahe.

² Aheve avei fariseo ‘¿ombogüerara pīha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tēi.

³ Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe avīye vahe pīha, mbahe naporai vahe tie?

¿Yaipĩsiro pĩha ava recocuer, yamocañi uca tẽi tie?
—ehi chupe.

Ahe rumo opaño iquiriri tupri yuvireco.

⁵ Evocoyase omahe ava oyese oyere tupri vahe rese voriẽhisave iyavei ndovihai ava ndosenducua catuise yuvireco. Sese aipo ehi ipo nomi vahe uve:

—Eichoho nde yiva —ehi.

Evocoyase oichoho oyiva, ocuera tupri ité.

⁶ Ahese fariseo opa yuvinose yuviraso oye-moingatu Herodes rupindar rese Jesús yuca ãgua yuvireco.

Ava rehi ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehi avei ivi Galilea rupindar yuviraso supi.

⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia ãgua.

⁹ Sese oyocuai güemimbohe vireco voi vaherã ñepi carite yuvireco ava omboti etepriẽhi ãgua yuvireco.

¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco ãgua.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tũpa Rahir ereico! —ehi.

¹² Jesús rumo oñehe pĩrata chupe: “Che mombe-hui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo ãgua güemimbotar rupi. Ichui oyugüeru yuvireco chupe.

¹⁴ Ahe ipãhu pendar osenoi doce tupri güemimboherã ‘toguataño che rupi, tomombehu Tũpa Ñehengagüer opacatu ivi rupi’ oya. Ahe osero “apóstol”

¹⁵ ‘toipisi avei mborerecuasa caruguar ava sui imboyepepi ãgua yuvireco’ oyapave.

¹⁶ Evocoi doce yuvirecoi vahe, ahe: Simón (sererguã acoi omondo Pedro),

¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi);

¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatêhi vahe pãhu pendarer;

¹⁹ iyavei Judas Iscariote, ahe omondo vaherã Jesús yamotarêhisar upe.

“Jesús caruguar pĩratasa vireco oyese” ehi tẽi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru ãgua yuvireco.

²¹ Oyanduse imu secocuer yuvireco, oyugüeru seraso ãgua ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia caruguar rerecuar Beelzebú oyocuai vahe, ipĩratasa pipe tẽi omboyepepi caruguar ava sui” ehi yuvireco.

²³ Evocoiyase Jesús omombehu caruguar recocuer aipo ehi: “¿Mara ehira aipo caruguar ahe ae oyeenose ava sui viña?”

²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pĩratasa ocañi tẽira.

²⁵ Acoi oñemu oyese ae oyeamotarẽhise, oyemboyahose yuvireco viña, ahe ndipocopi chiaveira yuvireco.

²⁶ Acoi caruguar oyemboyahose ovava ãgua oyeupe ae yuvireco, ndipocopi chiaveira yuvireco, ahe evocoiyase secocuer ocañi tẽi vaherã ité yuvireco.

²⁷ “Ndipoi eté niha ava oique vahe que ava ipĩrata etepri vahe rẽta pipe imbahe rerocuapa ãgua ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pẽu: Acoi ava yangaipa vahe upe Tũpa iñerora opacatu yangaipa rese, iñehe-ñehe tẽisa rese avei.

²⁹ Acoi iñehe-ñehe tẽi vahe rumo Espiritu Santo rese, ahe chupe ndipo iri chietera ñerosa apirẽhi vaherã ité” ehi.

³⁰ Aipo ehi Jesús imboyevi ava upe. Esepia, “Caruguar tẽi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichẽ ãgua.

³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tẽi yuvireco —ehi.

³³ Ahe rumo,

—¿Ava pīha che si; ava pīha che rīvireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rīvireta.

³⁵ Esepia, acoi Tūpa remimbotar oyapo vahe yuvireco, ahe che rīvri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve uguapi oĩ oñehe. Ava rumo opacatu ivi ātasa rupi opitaño yuvireco.

² Evocoyase ava mbohe āgua omboyoya tecocuer mbahe tīsa rese aipo ehi:

³ “Pesendu co ñehesa: Ñepe mbia osẽ omaheti.

⁴ Ahe otiapi-apiise mbahe rāhii oso, moviro ovīapi peri rupi. Vĩrai yugüeruse rumo, opaño yuvirohu.

⁵ Iyavei moviro oiti ivi nayanai vahesave, ita pāhuve. Sese cūriteimi sorī.

⁶ Ari tasise rumo, opaño ipiru. Esepia, ndasapoi niha.

⁷ Iyavei ambuae mbahe rāhii oiti yu pāhuve; ahe yu rumo sorī poyava catu. Sese opaño oyopi. Evocoyase ahe miti ndihai eté.

⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapısacaño sese” ehi Jesús ava rehii upe.

¿Mahera p̃ha co yembohesa imboyoyasa ambuae mbahe rese?

¹⁰ Ipare Jesús op̃ta ahe ae. Ava op̃ta ṽite vahe semimbohe eta reseve oyemboya yuṽiraso sese oporandu yuṽireco chupe, “¿Mara oya vo co yembohesa aipo ehi?” ehi yuṽireco chupe.

¹¹ Ahe aipo ehi: “P̃eu niha T̃upa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi.

¹² Yepe osepia t̃eira, ndosepiacuai chietera rumo yuṽireco. Iyavei yepe osendu t̃eira, ahe rumo ndosenducuai chietera yuṽireco, T̃upa upe oyeví potaẽhisave, ipipe sui ndipoi chira ñeroisa yuṽireco chupe” ehi.

Jesús omombehu tupr̃i yembohesa mbahe t̃isa resendar

¹³ Iyavei aipo ehi: “¿Ndapesenducuaيمي vo aipo porombohesa? ¿Mara peyera ru opacatu ambuae che porombohesa cua tupr̃i ãgua?

¹⁴ Evocoi mbahe r̃ãhii oñot̃i vahe, T̃upa Ñehengag̃uer mombehusar nungar.

¹⁵ Amove ava recocuer inungar co mbahe r̃ãhii seitipr̃i per̃i rupi: osendu angahu T̃upa Ñehengag̃uer. Sendu pare rumo, ou Carugar oṽirocuapaño oi que vahe ip̃iha p̃ipe ichui.

¹⁶ Ambuae ava recocuer inungar mbahe r̃ãhii seitipr̃i ita p̃ãhu rupi: osendu T̃upa Ñehengag̃uer, oip̃isi tupr̃i angahu oyeupe nara vor̃ivetesa p̃ipe;

17 ndovirecoi rumo guapo oyese opĩrata āgua. Evocoiyase yuvirecoise mbahe-mbahe tēi pĩpe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco.

18 Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar,

19 ahe rumo ipihañemoñeta catu opacatu ombahe eta co ivi pĩpendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipĩpe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe.

20 Ambuae ava rumo osendu vahe Tūpa Ñehengagüer seroyasa pĩpe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

21 Iyavei aipo ehi: “¿Serecosa vo tataendi mbahe riruvrive nara tēi iyavei yande rupavrive nara tēi no? Aní, tataendi imondosa ivate poroesape āgua.

22 Ndipoi chietera mbahe ñomipri ndayasepiai vahe rā curi.

23 Acoi osendu pota vahe che ñehe, toyapisacaño yuvireco sese” ehi.

24 Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu.

25 Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rāhii rorisā resendar

²⁶ Aipo ehi iri avei Jesús: “Tũpa mborerecuasa co ivi pipe inungar que ava oñoti vahe mbahe rãhi.

²⁷ Omaheti pare, oso oque. Ipare coiye catu oñarapuha. Ahe oñocua pĩtu, ari avei, evocoyase mbahe rãhi sori poyava yuvireco. Itĩsar rumo ndoicuai mara ehi vori.

²⁸ Ivi rese niha oyesu miti: yipĩndar sori, ipare iha, ipare sãhi yuvinose sese.

²⁹ Evocoyase co mbia mbahe ha yaviyese, oipoho. Esepia, oyepota ari ipoho ãgua chupe” ehi.

Yembohesa mostaza rãhi suindar

³⁰ Iyavei aipo ehi: “¿Mara ehi vo Tũpa povri pendar co ivi pipe pẽu; mbahe rese pĩha iyacatu imboyoyasa icua ãgua?

³¹ Ahe oyoya tupri mostaza rãhi rese. Ahe tahimi catu opacatu ambuae mbahe rãhi sui.

³² Ñoti pare rumo, sori, ocuacuase tuvichá catu ambuae mbahe miti sui. Sãca tuvichá ité, sese vĩrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ëgüe ehi Jesús oporombohe Tũpa Ñehengagüer rese, omboyoya-yoya ñepei mbahe ambuae mbahe rese ava mbahecuagüer rupi.

³⁴ Nomombehui eté mbahe ambuae mbahe rese imboyoyaẽhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohĩtu vahe, ivĩtu ai reseve

³⁵ Ahe ari pipe pĩtu ramomise, aipo ehi güemimbohe upe:

—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi.

³⁷ Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe.

³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoiyase aipo hese, omahe, oñehe pĩrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri.

⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivitu ai, ipa avei omboyeroya —ehi tẽi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso.

² Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe.

³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opaopaño omondoso.

⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe.

⁵ Ari, pĩtu rupi oguata, osapucai oico ivitri mahugüer rupi, tuvipa mahugüer rupi avei; ocua-ocua ita pipe oyese yepi.

⁶ Amombri Jesús repia ramoseve, oña senonde oñenopiha voi sovai,

⁷ oñehe pĩrata chupe:

—¡Eyepepi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuehi ãgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

¹⁰ Oporandũo chupe omondopaēhi ãgua co ivi sui.

¹¹ Ichui namombriimi setá cuchi ocaru vahe ivitri rese yuvireco.

¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē ãgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave,

caha pîpe rupi yuvîrecoi vahe upe avei. Sese ava opa yugüeru sepia ‘¿mbahe pîha?’ oya yuvîreco.

¹⁵ Oyepotase Jesús recosave, aheve osepia mbîa carugar vîreco vahecuer yuvîreco oyemonde tuprise oî, yaracua tuprise avei. Ahese oyembosiquiye tîi yuvîreco.

¹⁶ Mbahe oime vahe carugar vîreco vahe rese, cuchi rese avei, ahe sepiasar omombhupa ambuae ava upe yuvîreco.

¹⁷ Evocoyase ava Jesús upe: “Esê cohava sui” ehi yuvîreco.

¹⁸ Oha irise Jesús carite pîpe, co mbîa carugar rerecosarer oporandu chupe supi oso âgua.

¹⁹ Ahe rumo,

—Esoño nde rêtave, nde mu piri. Aheve emombhupa Yar oporoaisusa pîpe mbahe oyapo vahecuer nde rese —ehiño chupe.

²⁰ Ahe mbîa oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tîi yuvîreco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pîpe îpa rovai oso, aheve oñemonuha ati ava yuvîreco chupe. Ahe evocoyase opitaño îpa popive.

²² Evocoyase oyepota mbîa mborerecuar tûparo pendar, ahe serer Jairo. Jesús repiase, oñenopiha sovai,

²³ aipo ehi chupe:

—Che rayri omano pota. Yaso, teremondomi tîi nde po iharive imbogüera âgua —ehi.

24 Evocoyase oso supi. Ava rehi avei yuviraso supi.

25 Ipãhuve avei oime cuña doce araviter rupi suvi yepiyere-yere vahe.

26 Iparaisú iteanga, setá oporoposano vahe ndoicatui imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe.

27 Co cuña osenduse Jesús rese ñehesa, oguata saquicuei oso ava rehi pãhuve, iturucuar rese opoco.

28 Aipo ehi oyeupe oico: “Iturucuar rese apocose rumo, acuerara” ehi.

29 Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui.

30 Jesús rumo oyandu osēse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

31 Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

32 Ahe rumo omaheño vite ité ava oiviindar rese ‘¿uma ité pĩha opoco che turucuar rese?’ oya.

33 Evocoyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe.

34 Evocoyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Iñehe vīteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ãgua; Pedro, Santiago, Juan güeraño oipota.

³⁸ Oyepotase Jairo rētave, osepia ava yemondii oyaseho vahe.

³⁹ Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoyase omose opacatu ava. Ipare omoingue iyesupa, ichi, oyeupindar reseve cuñatai rehögüersave.

⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

⁴³ Jesús rumo oyocuai imombehuēhi ãgua ambuae ava upe. Ipare,

—Pembocaru co cuñatai —ehi.

6

Jesús Nazaret ve secoi

¹ Jesús osẽ co tecua sui oso güecuave; semimbohe avei yuviraso supi.

² Oyepotase mbituhusa ari, ahese oporombohe tũparo pipe. Setá ava iñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pĩha vinose co mbahecuaasa co poromondiisa apo ãgua? —ehi yuvireco oyeupe—.

³ Co niha carpintero, María membri; Santiago, José, Judas iyavei Simón riquerir, seindri avei yuvirecove yande pãhuve —ehi.

Sese ndoviroyai yuvireco.

⁴ Jesús rumo aipo ehi ahe ava eta upe:

—Tũpa ñehe mombehusar avei niha ava omboetei opacatu rupi yuvireco yepi, imu sêta pipendar ae rumo nomboetei yuvireco —ehi.

⁵ Ndoicatui mbahe oporomondi vahe apo ãgua ava viroyaẽhisa pipe, sese moviro tẽi imbaheasi vahe harive omondo opo imbogüera ãgua.

⁶ Ndoyembovihai ava viroyaẽhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, oguata tecua-tecuami namombrĩ vahe rupi oporombohe oico.

⁷ Evocoiyase, “Perio” ehi güemimbohe doce vahe upe. Ipare oyocuai ñuvirio-río, iyavei omondo güeco pĩratasa carugar mboyepepi ãgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei.

⁹ Iyavei pemondera p̄itaqui güeraño. Ndape-mondugüei chiaveira pe camisa seraso.

¹⁰ —Que pesosave peiquesse oi p̄ipe, pep̄itaño ip̄ipe, ichuive tupriño ité pesēra pecua.

¹¹ Acoi ambuae tecua pendar ndape p̄isi potaise, ndosendu potaise avei pe ñehe yuvireco, peyep̄ep̄iñora ichui. Peip̄ipeteño aveira pe p̄i ivi r̄ätachigüer sui. Êgüe pe hesa omboyecuara cañisa ap̄irēhi yuvireco chupe —ehi.

¹² Evocoyase semimbohe eta yuviraso, “Pembواسi pe angaipa, peyevi Tũpa upe” ohe ãgua yuvireco.

¹³ Iyavei setá omboyep̄ep̄i caruguar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ip̄irata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūritei ocuerayevi —ehi.

¹⁷ Herodías recocuer sui tēi niha Herodes Juan oñap̄ichi uca carena p̄ipe soquenda. Esepia, co

cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese.

18 Juan aipo ehi Herodes upe: “Ndiyai eté nde ererectora nde rivri rembireco” ehi.

19 Herodías evocoyase oyuca pota Juan yamotarēhisave; ndoicatui rumo yuca.

20 Esepia, Herodes osiquiyeyño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité.

21 Coiye rumo osupiti arí Herodías remimbotar apo āgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei.

22 Herodías membrí cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

23 Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi.

24 Ahe cuñatai osē oso, osi upe oporandu:

—¿Mbahe rese pñha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe ãca rese —ehi chupe.

25 Ipare cuñatai oña, oique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

²⁶ Mborerecuar rumo ndoyembovihai tēi. Esepia, ava ichohopri rovaque ité yipindar oñehe. Sese ndoicatui, “Aní” ohe ãgua.

²⁷ Evocoyase ipare voi mborerecuar oyocuai sundao Juan ãca reru ãgua.

²⁸ Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe.

³¹ Ahese aipo ehi oapóstol upe:

—Perio cohave, yaso, yapituhumi rane co coti — ehi.

Esepia, oyepindecuaño ité ava yugüeru chupe, sese ndiyai icaru ãgua yuvireco.

³² Evocoyase ahe güeraño apóstol reseve yuviraso carite pipe co coti ava sui.

³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui.

³⁴ Ogüeyise rumo carite pipe sui, osepia ava rehi, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese.

³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe.

³⁶ ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevî:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pîha oreu dosciento denario pan repirã ava mbocaru ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapî capihi hari rupi.

⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipîsi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehîi upe imondo ãgua yuvireco. Pira ñuvirío vahe avei omboyaho-yaho opacatu ava upe.

⁴² Evocoyase opacatu ava ocaru vahe ihîtaropa tẽi yuvireco.

⁴³ Ipare semimbohe omboapîpopa doce tupri iruova pan iyavei pira rumbîrer yuvireco.

⁴⁴ Cuimbahe ocaru vahe retacuer cinco mil tupri.

Jesús oguata î hari rupi

⁴⁵ Ipare Jesús, “Peha pe rane carite pîpe, pesasa îpa Betsaida ve peso che renondeve. ‘Aviye’ tahe rane ava eta upe” ehi güemimbohe upe.

46 “Aviye” ohe pare ava upe, oyeupi oso ivitri rese oyeroqui ãgua.

47 Pıtuse carite ipa mbıterve ité secoi. Jesús rumo ahe ae opıtaño ivıve.

48 Ahese omahe güemimbohe rese iyeapicui catuẽhıse. Esepia, ivıtu ipırata vahe osovaıchi yuvıreco. Cõhe potase, oguata i hari rupi güemimbohe coti oso. Aviye ité acoi oñocuaño vaherã oso.

49 Sepiase rumo ‘hãgüer tõi revo’ oya, sãse pucu-pucu i hari rupi iguatase semimbohe yuvıreco.

50 Esepia, opacatu osepıase osıquıye yuvıreco ichui. Ahe rumo aipo ehi:

—ıPeyemovıracuaño, che tõi! ıPesıquıye eme che sui! —ehi güemimbohe upe.

51 Ahe ohase carite pıpe, opıtuhu voi ivıtu. Evo-coiyase, “ıMara ehi ruteı!” ehi tõi yuvıreco.

52 Esepia, ndoicua vıtei eté pan apo atı agüer yuvıreco, yavai vıte seroya ãgua yuvıreco chupe.

Jesús ombogüera ava imbaheasi vahe Genesaret pendar

53 Osasase ipa, oyepota Genesaret ivı rese yuvıraso, ahe imbehıve oñapıchıño carite yuvıreco.

54 Yuvınosepa ramomıseve, ava oicua voi Jesús yuvıreco.

55 Ichui opacatu ahe ivı pıpendar güeru imbaheasi vahe Jesús upe yuvıreco.

56 Oyepotase que tecuamıve, anıse tecua gısuve, caha pıpe oi-oımi rupi, ahe supı imbaheasi vahe ocar rupi vınosepa voi yuvıreco. “Topocomı tõi nde turucuar popı rese” ehi yuvıreco chupe.

Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco.

² Ahese ahe osepia Jesús remimbohe ocaru ãgua iyepoiêhise porocuita mboaviyeêhise yuvireco, sese oñemoiro yuvireco chupe.

³ (Esepia, fariseo iyavei opacatu judío eta arachendar recocuer sui ndipoisai eté yuvireco, sese oyepoiêhise ndocarui eté yuvireco yepi.

⁴ Mbahe rerocuasa sui oyeveise, ndocarui oye-poiêhi viteseve yuvireco. Iyavei tecocuer arachendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.)

⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi arachendar recocuer ndoviroya iri yuvireco? Esepia ru, ahe ocaruño opo quihá reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehusar Isaías rembicuachía arachendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ĕgüe peye pepoipa Tũpa porocuita sui ava recocuer aracahendar rupi tẽi pe guata ãgua —ehi.

⁹ Iyavei aipo ehi iri chupe:

—Pe ramoi recocuer aracahendar pĩpe tẽi pe-seyaño co coti Tũpa porocuita.

¹⁰ Esepia, Moisés aipo ehi: ‘Pemboyeroyara iyavei peipĩtivĩira pe ru, pe si avei no. Acoi ñehe mara vahe oyesupa upe ahe, Tomanofño, ehi’ ehi aracahe.

¹¹ Pe rumo aipo peye tẽi: ‘Acoi ava aipo ehi vahe vu upe, osi upe avei no: Ndiyai chira mbahe mondo ãgua pẽu. Esepia, che opacatu mbahe areco vahe Tũpa upe imondopri, ahe Corbán, ehi’ peye;

¹² pe evocoyase, aipo ehi vahe upe, ‘Ndiyai eté oyesupa pĩtivĩi ãgua’ peye.

¹³ Co nungar apo pĩpe Tũpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehĩ upe.

—Peyapĩsaca, pesenducua tupri che ñehe:

¹⁵ Ndahei ocar sui tẽi ou ava recocuer monguiha ãgua. Ahe rumo osẽ ipĩha sui.

¹⁶ Acoi osendu pota vahe che ñehe, toyapĩsacaño sese —ehi.

¹⁷ Ipare oseyapase ava, oique oi pĩpe. Aheve semimbohe eta oporandu yuvireco co porombohesa omombehu vahe rese chupe.

¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava avĩterve nomboangaipai eté?

¹⁹ Esepia niha, ndahei ipihave oso, ahe rumo oso yaviterve. Ipare osẽ ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava pihã sui osẽ vahe rumo mbahe, ahe omonguiha ava recocuer.

²¹ Esepia, ava pihãñemoñetasa sui osẽ pihãñemoñeta raisa, yemboaguasasa, mondasa, porapichisa,

²² mendasa sui yemboaguasasa, mbahe pota raisa, teco raisa, porombopasa, mbahe tẽi pota raisa, mbahe rese ñemoirosa, ava rese ñemoñeta tẽisa, teco ivate aisa, pihãñemoñetasa nihivi vahe.

²³ Co mbahe opacatu naporai vahe yuvinose ava sui imboangaipa uca ãgua —ehi.

Cuña ndahei vahe judía viroya Jesús

²⁴ Ichui Jesús osẽ oso tecua Tiro coti. Aheve oique oi pipe, ndoyecua uca potai ava upe viña; ndoicatui rumo ava sui oñemi.

²⁵ Oime cuña vireco vahe omembrĩ cuñatai, ahe vireco carugar oyese; ahe cuña oicuase Jesús recosa, oso voi sovai oñenopiha.

²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membrĩ sui carugar” ehi.

²⁷ Jesús rumo aipo ehi chupe:

—Tahĩr judío rane toipisi mbahe yuvireco. Esepia, naporai yarocua pan tahĩr sui cave tohu imondo ãgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahĩr mesavri pendar —ehi.

29 Aipo ihese, aipo ehi:

—Aviye ité nde ñehe. Eyeve eso. Carugar osẽ nde membri sui —ehi chupe.

30 Co cuña oyepotase güetave, osepia omembri supave; yipive rumo osẽ carugar ichui.

Jesús ombogüera mbia ndayapisai, ñehe ipiti-piti vahe

31 Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve.

32 Aheve mbia ndayapisai, ñehe ipiti-piti vahe rerasosar: “Emondomi tẽi nde po iharive” ehi yuvireco chupe.

33 Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese.

34 Ipare omahe iva rese, ipituhe pucu aipo ehi: “¡Efata!” ehi (“timboisa” ohesave aipo ehi).

35 Ahe pipeve voi yapisa tupri, oñehe tupri avei.

36 “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

37 Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, ñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

1 Ñepe ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoí eté mbahe semihura.

³ Amondopase sētave sieporēhi reseve, viroviapi-api tiētera tieporēhi peri rupi yuvireco viña. Esepia, setami ava yugūeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohave ava porēhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehi upe. Ahese oipisi siete pan, “Aviye ndeu” ehi Tūpa upe. Ichui omboyaho-yaho pan imondo güemimbohe upe, semimbohe evocoyase omondo ava rehi upe yuvireco.

⁷ Iyavei vireco moviro pirami yuvireco, sese avei, “Aviye ndeu” ehi iri Tūpa upe. Ichui güemimbohe upe, “Pemboyaho-yaho ava upe” ehi.

⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco.

⁹ Ava rehi ocaru vahe retacuer cuatro mil tupri. Ipare Jesús, “Aviye, peso tupri” ehi ava upe.

¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi ãgua yuvireco. Jesús recoãha ãgua, oporandu iva

pendar poromondiisa rese ‘¿Tũpa sui eté pĩha ou?’ oya yuvireco chupe.

¹² Sese Jesús ipĩtuhe pucu, aipo ehi:

—¡Mahera vo co ava oipota iva pendar poromondiisa che recocuer cua ãgua yuvireco! Namboyecuai chietera rumo que ñepeí evocoi nungar mbahe pẽu —ehi.

¹³ Ipare oseypaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tẽi pan viraso güemihura yuvireco.

¹⁵ Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruise revo aipo ehi yandeu” ehi-ehi tẽi oyeupe yuvireco.

¹⁷ Ahe rumo oicua güemimbohe pĩhañemoñetasa, aipo ehi:

—¿Mahera, “Pan ndayarui” peye? ¿Ndapeicua vitei vo che rembiapo? ¿Yavai vite tie seroya ãgua pẽu?

¹⁸ Oime tẽi pe resa, ndapesepiai rumo; oime tẽi pe nambi, ndapesendui rumo mbahe. ¿Ndapeyemomahenduha iri vo

¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

21 Ipare aipo ehi:

—¿Ndapesenducua vıteı vo? —ehi güemimbohe upe.

Jesús ombogüera ava ndasesapısoı vahe tecua Betsaida ve

22 Oyepotase Jesús tecua Betsaida ve, ahe ramo-seve voi ogüeru ndasesapısoı vahe yuvıreco chupe ‘epocomi tēı sese’ oya yuvıreco.

23 Evocoiyase oipopısi ndasesapısoı vahe seraso co cotımi tecua sui. Aheve omondo güendi sesa rese, omondo aveı opo iharıve. Ipare oporandu chupe: “¿Eresepia vo mbahe?” ehi.

24 Ndasesapısoı vahe omahese, aipo ehi:

—Asepia ava inungar ivıra oguata vahe yuvıreco —ehi.

25 Evocoiyase omondo iri opo sesa rese. Ipare co mbıa omahe tuprı ité cute, ocuera ité, opacatu mbahe osepia tuprı.

26 Ichui Jesús omondo sētave aipo ehi chupe:

—Ereyevı iri eme tecuave —ehi.

Pedro oicua uca Jesús Tūpa Rembıporavo seco rese

27 Ipare yuvıraso Jesús güemimbohe reseve ivı Galilea sui tecua Cesarea cotı, Filipo ivı rese. Perı rupı oporandu güemimbohe upe:

—¿Mara ehi vo ava oñehe yuvıreco che rese? —ehi.

28 Semimbohe evocoiyase omboyevı yuvıreco chupe:

—Amove ava, “Juan Oporoãpiramo vahe” ehi yuvıreco ndeu; ambuae evocoiyase, “Elías” ehi; ambuae, “Tūpa ñehe mombehusar mboetasa” ehi yuvıreco ndeu —ehi.

29 Evocoiyase oporandu iri güemimbohe upe:

—Pe no, ¿ava, “Co secoi” peye ru pe cheu no? — ehi.

Pedro evocoyase aipo ehi chupe:

—Nde niha Tũpa Rembiporavo Poropĩsirosar ereico —ehi.

³⁰ Jesús rumo, “Pemombehui rene que ñepei ava upe” ehi.

Jesús omombehu omano ãgua

³¹ Evocoyase Jesús omboĩpi oporombohe: “Che, Ava Riquehĩr, che paraĩsu ĩtera, iyavei opacatu judío rerecuareta, pahĩ rerecuar ivate catu vahe iyavei Moisés porocuita rese oporombohe vahe remiamotarẽhi aicora. Ahe avei che yuca ucara yuvĩreco. Acuerayevira rumo mbosapi ari rupi” ehi.

³² Ahe omboyecua tupri ité chupe. Evocoyase Pedro viraso co cotimi chupe oñhengata ãgua.

³³ Oyemboyere rumo, omahe güemimbohe eta rese, oñhengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tũpa upendar rese; ava nungar tẽi nde pihañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tẽi aposa sui, iyavei ĩnungarra curusu rese ovosira viña, toyemoingatu voi che recocuer rese oparaĩsu ãgua iyavei toguata tupri che rupi.

³⁵ Esepia, acoi ava güetecuer tẽi raĩsupar, ocañi tẽi etera. Acoi ava omocañi tẽi vahe rumo güetecuer che recocuer rese, ñehesa ñepisirosa sui avei, ahe oñepisirora.

³⁶ ¿Aviye ai angahu pīha ava upe opacatu mbahe ivi pīpendar pīsi āgua tēi, ahe ae tēi omocañi güecocuer yuvireco viña?

³⁷ ¿Mbovi pīha omondora ava güecocuer repirã viña?

³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, ēgüe ahera acoi ayevice che Ru reco pīrata porañetesa pīpe, sembiguai rehi i va pendar maranehi reseve curi –ehi.

9

¹ Ipare Jesús aipo ehi iri:

–Supi eté, oimera amove cohava ava nomano vītei chivaherã, osepia rane itera ouse Tūpa mborerecuasa ipīratasa pīpe yuvireco curi –ehi.

Jesús ñecuñaaro agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaaro güemimbohe rovai.

³ Iturucuar sendí, morochí eteanga. Ndipoi eté que ava co nungar co ivi pīpe turucuar oyosei vahe.

⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinoha.

⁵ Ipare Pedro aipo ehi chupe:

–Ore mbohesar, javiye ai eté cohava yaico! Toroyapo mbosapi teyupami: ñepei ndeu nara, ambuae Moisés upe, ambuae evocoyase Elías upe nara –ehi.

⁶ Osiquiye tēi semimbohe yuvireco. Sese Pedro ndoicuaise oñehe āgua, aipo ehiño tēi.

⁷ Ahe ramoseve avei ogüeyi ìva quìha iharìve, oyopìpa tuprì yuvìreco. Ahe ipãhuve oyeendu ñehesa aipo ehi vahe: “Co che Rahìr, che rembiaìsu; peyapìsaca catu ìñehe rese” ehi vahe.

⁸ Ahe ramoseve avei omahese oivìi yuvìreco, ndosepiaì eté que ambuae ava, Jesús güeraño tuprì ité osepia opãhuve yuvìreco.

⁹ Ipare ogüeyi ivìtrì sui yuvìreco, aipo ehi güemimbohe upe ou: “Ndapemombehui chietera que ñepeì ava upe co mbahe pesepia vahe, pemombehura rumo acoi che, Ava Rìquehìr, acuerayevìse voi” ehi.

¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pìha aipo, ‘Acuerayevìra’ ehise?” ehi tēi yuvireco.

¹¹ Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moin-gatu água. ¿Mahera aracahendar icuachiapri pìpe aipo ehi: “Ava Rìquehìr oiporarara mbahe, yamotarēhimbri avei secoira” ehi?

¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. Ëgüe ehi opacatu yavìye aracahendar icuachiapirer sese —ehi.

Jesús ombogüera chñivahe caruguar rerecosar

¹⁴ Ipare oyevi yuvireco güemimbohe recosave. Aheve osepia ava rehìi oyere guasuse yuvireco sese, iyavei oime aheve Moisés porocuita rese

oporombohe vahe oiñehepoepi-epi semimbohe yuvireco.

¹⁵ Ichui Jesús repiase, opacatu yuvinoña yuviraso chupe “avirave” apo.

¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepei ipãhu pendar omboyeve chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi.

¹⁸ Iyavei que iguatasa rupi co carugar aviyeteramo tẽi opocose sese, oiti voi ivive iyavei sendiriyuiyusu, sãitere-tere avei; sese cũritei nipirata iri eté. “Penosemi carugar ichui” ahe tẽi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyeve chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chihivahe cheu —ehi.

²⁰ Evocoyase ogüeru yuvireco chupe. Osepiase carugar Jesús, oiti uca iri chihivahe ivive. Omboapayere-yere iyavei sendiriyui guasuguasu.

²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichihivahemi suive ité.

²² Amove co carugar oiti uca tatave, ive avei yuca pota uca ãgua yepi. Sese ereicatuse, ore pitiviñomi tẽi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pĩtivii ru eve nde reroya catu ãgua! —ehi pĩrata chupe.

²⁵ Osepiase Jesús ava rehi, oyemboyase sese, oñehe pĩrata carugar upe aipo ehi:

—Carugar noñehei vahe, ndayapisai vahe, che orocuai, epoi co chĩhivahe sui, ereique iri eme secocuer rese —ehi.

²⁶ Carugar sãse pucu chĩhivahe yuca tupri oso. “Omano ité co chĩhivahe” ehi ambuae ava yuvireco.

²⁷ Jesús rumo oipopisi imopuha; evocoyase chĩhivahe opũha tupri voi eté.

²⁸ Ichui oique oi pipe. Aheve semimbohe ahe aemi oporandu yuvireco chupe:

—¿Mahera pĩha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe.

³¹ Esepia, güemimbohe güeraño ité ombohe aipo ehi:

—Che, Ava Riquehi, imondopri aicora che amotarẽhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu ãgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, peri rupi, “¿Ava pñha ivate catu vahe?” ehi asi asi oyeupe yuvireco.

³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pñhu pendar oyemboivate ai vahe, ahe rumo seco ivi coti catura opacatu sui ava eta pñtivi ãgua —ehi.

³⁶ Ipare oipisi chñhivahe güemimbohe pñhuve senoha aipo ehi:

³⁷ —Acoi ava oipisi vahe co chñhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarñimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cñritei ore rupi; ore ité ndoroipotai chupe —ehi.

³⁹ Jesús rumo,

—Aní ñgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheñ oñhe rai che rese.

⁴⁰ Sese ndayande amotarēhi vahe, ahe yande mboyoyasar secoi.

⁴¹ Acoi que omondo vahe i vaso pipe che rupi pe recosa pipe pēu, evocoi nungar oipisi itera porerecosa oyeupe nara —ehi.

Yaicua catura mbahe tēi apoēhi āgua

⁴² “Acoi que ava omboangaipa uca vahe co chīhivahemi nungar che reroyasar, iyacatu evocoi nungar ñapichisa ita mbahe mbocuhisa iyēsīho rese para guasu pipe imombo āgua.

⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirēhisave ñepepe po rese, peso rāgüer sui que ñuvirío pe po rese tata guasu apirēhisave.

⁴⁴ Aheve acoi uru nomanoi vahe, tata ndogüei vahe avei.

⁴⁵ Pe pipe mboangaipa ucase, peyasia avei peyesui. Esepia, aviye catu ndape pindugüei peique tecovesave, que ñuvirío pe pipe rese peique rāgüer sui tata guasu ndopai vahesave.

⁴⁶ Aheve acoi uru nomanoi vahe, tata ndogüei vahe avei.

⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepepe resa rese Tūpa mborerecuasave que ñuvirío pe resa rese tata guasu apirēhisave pe reique rāgüer sui.

⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe.

⁵⁰ Sese yucri aviye ai eté. Nasehe irise rumo, ndayaicatui chira imoehe iri āgua. Peico catu yucri nungar mbahe tupri pipe peyeupe nara” ehi.

10

Jesús oporombohe mendasa sui poiēhi āgua

¹ Ipare Jesús osē tecua Capernaum sui, oso Judea ivi rupi iai Jordán rovai ari sēsa coti. Aheve ava rehi oñemonuha iri yuvireco sese. Iyavei ombohe iri ava güecocuer rupi tupri.

² Evocoyase fariseo oyemboya seco rāha āgua tēi yuvireco sese, “¿Aviye pīha cuimbahe omenda vahe opoi güembireco sui?” ehi yuvireco chupe.

³ Ahe rumo omboyevī chupe:

—¿Mara ehi vo acoi Moisés porocuita pipe? — ehi.

⁴ Ahe evocoyase omboyevī yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi āgua pe rembireco sui” ehi — ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaēhisa pipe sui pēu.

⁶ Yipisuive ité niha, “Tūpa oyapo opacatu mbahe, oyapo avei cuimbahe, cuña reseve.

⁷ Sese niha cuimbahe omendase, oyepēpīra oyesupa sui güembireco rese ité yuvirecoi āgua.

⁸ Evocoyase ñuvirío yuvirecoira ñepi ava nungar.’ Sese ndahe iri ñuvirío, ñepi nungar ité yuvirecoira.

⁹ Evocoyase ava Tūpa omomenda vahe oyese, ndiyai ava tēi omboyepēpī yuvireco oyesui — ehi.

¹⁰ Oive yuvirecoi vītese, semimbohe oporandu iri co mbahe rese yuvireco chupe.

¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui.

¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chīhivahe

¹³ Ipare ogüeru chīhivahe Jesús upe yuvireco sese ipoco āgua. Semimbohe rumo, “¿Mahera vo peruño tēi chīhivahe?” ehi opiha vīracuasa pipe serusar upe yuvireco.

¹⁴ Evocoyase Jesús osepiase, ndasorii güemimbohe upe aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave.

¹⁵ Supi eté, acoi ndoipisi vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisi, omondo opo iharive osovasa.

Ñepei mbia chīhivahe imbahe eta vahe oñehe Jesús upe

¹⁷ Oguata vītese Jesús yuvireco, aheseve mbia chīhivahe oña oso sovai, oñenopiha, oporandu chupe:

—Porombohesar avīye vahe, ¿mbahe vo ayapora tecovesa apirēhi vahe rereco āgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Avīye vahe” ere cheu? Oime rumo ñepei avīye vahe ité, ahe Tūpa secoi.

19 Ereicua niha Tūpa porocuita: ‘Ndereporoyuca chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

20 Ahe mbia rumo,

—Porombohesar, che aipo nungar opacatu amboaviye ité che chihivahe suive —ehi.

21 Evocoyase omahe saisusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe seprí evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

23 Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi.

24 Semimbohe evocoyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique ãgua ombahe eta rese tēi ipihañemoñeta vahe upe!

25 Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisirora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secói —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güeta, viquehir, vivri, güeindri, vu, osi, guahir iyavei oivi,

³⁰ ahe oipisira omahera co ivi pipe cien yu-pagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi.

³¹ Setá vai rumo cūritei yipindar vahe; ipa tēira yuvirecoi. Setá aveira cūritei ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyem-bovīhai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi:

³³ “Peicua niha, yasora tecua Jerusalén ve, aheve rumo che, Ava Riquehir, che písira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco.

³⁴ Mara ehi-ehi tẽira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuer-ayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaherã pẽu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepi nde mbahe rese pocosa coti, ambuae nde mbahe rese pocoẽhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pĩha che co mbahe-mbahe tẽi aiporara vaherã, inungar-ra que igua iro vahe aihu vaherã viña? Iyavei, ¿peicatura pĩha che ãpiramosa aipisi vaherã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaheerã nungar.

⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoẽhisa coti. Che Ru Tũpa omoingatu güembiporavo upe nara oguapi vaheerã che ipive — ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco.

⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe. Iyavei acoi ivate catu vahe oyecoapirasá iteanga omborerecuasa pipe yepi.

⁴³ Pe rumo ãgüe ndapeyei chira pe yeereco. Iy-acatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese.

⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese.

⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua — ehi.

Jesús ombogüera Bartimeo sesapisoẽhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehi

avei, aheve peri popive mbia ndasesapisoi vahe Bartimeo serer vahe, Timoteo rahir, oguapi oĩ.

⁴⁷ Osenduse, “Jesús Nazaret pendar” hesa, osapucai pĩrata:

—¡Jesús, David suindar, che paraisuerecomi tẽi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

⁴⁹ Evocoyase osenduse iñehe, opĩta,

—Peñehe chupe —ehi.

Ichui oñehe yuvireco chupe:

—Eyemonguerẽhi, epũha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opũha yesapiha oso chupe.

⁵¹ Evocoyase oporandu ndasesapisoi vahe upe:

—¿Mbahe vo ereipota ayapo vaherã ndeu? —ehi.

Ahe evocoyase,

—Porombohesar, che mbosarecomi tẽira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoi vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei

ivitrí Olivo ñipiimi. Aheve Jesús omondo ñuvirío güemimbohe,

² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbrí imoha, ava ndoyeupi vifei vahe yuvireco sese, ahe peyorañora seru.

³ Acoi que ava: “¿Mahera vo ãgüe peye?” ehise pẽu, “Ore Yar oiporu pota, ipare niha omboyeví voiñora” peyera chupe —ehi.

⁴ Evocoyase ahe yuviraso perí rupi. Aheve guaricu ñapichimbrí osepia imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohessa rupi tupri ité omboyeví yuvireco chupe. Evocoyase, “Tovirasoño” ehi yuvireco chupe.

⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive.

⁸ Setá ava oipipira oturucuar perí rupi, ambuae ava evocoyase oyasia pindo omondo perí rupi saperã yuvireco.

⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe—.

¹⁰ ¡Sovasapri yande ramoi David mborerecuasa tasecoi ou vahe oico! ¡ivave imboeteipri tasecoi! —ehi yuvireco chupe.

11 Ëgüe ehi Jesús oiquese Jerusalén ve. Ipare oiique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

12 Ahere ayihive, yuvinosese Jesús tecua Betania sui, ndasiepoi oico.

13 Osepiase amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha ãgua.

14 Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vaherã! —ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

15 Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo.

16 Ndoipotai eté que ambuae mbahe seroiquepirã tũparo pipe.

17 Ipare oporombohe aipo ehi:

—Icuachiapri aracahendar pipe aipo ehi: ‘Co che rëta yeruresa rëtarã opacatu ava ivi pipendar uve nara’ ehi. Pe rumo imonda rai vahe rëta nungar tẽi pereco —ehi.

18 Pahi eta rerecuar iyavei oporombohe vahe Moisés porocuita rese osenduse, “¿Mara yahera

pĩha sereco yuca uca ãgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovihal iporombohesa rese yuvireco.

¹⁹ Pĩtu ramomise, Jesús yuvínose güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco.

²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tũpa rese —ehi—.

²³ Supi eté aipo ahe pẽu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ãgüe ehi etera chupe.

²⁴ Sese aipo ahe pẽu: opacatu que mbahe rese peporanduse pe yeroquisa pipe, peyeroya itera mbahe oime vaheã rese pẽu, ahese peipisi itera.

²⁵ Acoi peyerquoise, yipindar peñero rane que pe amotarẽhimbar upe, ahese ãgüe ehi aveira pe Ru iva pendar iñero pe angaipa rese pẽu.

²⁶ ãgüe ndapeyeise, pe Ru iva pendar avei niñeroi chira pe angaipa rese pẽu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese.

28 Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo água? —ehi yuvireco chupe.

29-30 Evocoiyase omboyeví chupe:

—Che avei aporandura mbahe rese pẽu: ¿Ava vo Juan ombou ava ãpiramo água; Tũpa pĩha, ava tẽi tie? Pemboyevise cheu, ahese che avei amombehura pẽu ava porocuita rupi eté pĩha ayapo co mbahe vichico —ehi.

31 Evocoiyase oñemoñeta aipo ehi oyeupe yuvireco: “ ‘Tũpa ombou’ yahese chupe viña, ahe evocoiyase: ‘¿Mahera ru ndaperoyai?’ ehira yandeu.

32 ‘Ava tẽi remimbou’ ndayahei chiveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi.

33 Evocoiyase omboyeví chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pẽu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

1 Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oiví pipe, ahe oñachi tuprí sereco iyavei oyapo mbahe uva ricuer renose água. Oyapo avei oiví vahe opacatu mbahe moha água. Ipare oseya oiví

ava oporaviqui vahe upe iporu ãgua. Ichui osẽ, oso amombri vahesa rupi.

² Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña.

³ Ahe rumo oipisiño, inupa-nupa imboyevi tupri tẽi yuvireco.

⁴ Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tẽiño avei yuvireco chupe.

⁵ Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocuaño yuvireco, oyucaño avei ambuae yuvireco.

⁶ “Iyavei ñepeï opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña.

⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco.

⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

¹¹ Ëgüe ehi niha yande Yar yapo.

¡Mara ehi rutei revo!' ehi icuachiapri pipe" ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecõha iri tõi Jesús guarepochi rese yuvireco

¹³ Ipare mborerecurar omondo fariseo iyavei mborerecurar Herodes rupindar avei Jesús upe 'toyavi angahu õñehe' oya yuvireco chupe.

¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tõi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tüpa remimbotar apo ãgua rese. ¿Aviyera pïha yamondo guarepochi rese oporanduse Roma pendar mborerecurar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pïhaẽhisa, sese aipo ehi voi chupe:

—¿Mahera che moingue pota mbahe tõi pipe peye? Peru evocoyase ñepeï guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecurar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tũpa upendar mbahe evocoiyase pemondora Tũpa upe —ehi.

Evocoiyase oyepihamondii tẽi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tẽi angahu yuvireco chupe:

¹⁹ —Porombohesar, Moisés niha oseyagüembicuachiagüer yandeu aipo ehi: “Que cuimbahe omenda vahe omanose guahiẽhiseve, tivri evocoiyase omendara sembirecocuer rese ahe viquehir omano vahecuer upe nara tahira oico.”

²⁰ Oime siete tupri oyesuindar pãve yuvirecoi vahe. Yipindar vahe omenda. Ichui omanoño, ndatahi eté rumo.

²¹ Ipare tivri omenda viquehir rembirecocuer rese. Ahe rumo omanoño, ndatahi avei rumo. Ëgüe ehi tupri avei tivri imombosapisa.

²² Ëgüe ehi co siete tupri omenda ahe cuña rese, ndatahi eté rumo yuvireco. Coiye rumo cuña omano avei no.

²³ Evocoiyase opase ocuerayevi yuvireco, ¿uma rembireco itera pĩha? Esepia niha, siete tupri ité omenda tẽi yuvireco sese —ehi yuvireco chupe.

²⁴ Evocoiyase Jesús omboyevi chupe:

—Pe pihañemoñeta pipe peyavi. Esepia, ndapeicuai eté Tũpa ñehe icuachiapri aracahendar, ndapeicuai avei Tũpa pĩratasa.

²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai ìva pendar nungar yuvirecoira ìvave.

²⁶ Co cuerayevisa resendar rumo amombehura pēu: aviye ndapeyeroqui anga vahe Moisés rembicuachiagüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe.

²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepi Moisés porocuita rese oporombohe vahe osendu ñehe pīratase oyeupe yuvireco, oicua avei Jesús omboyevi tuprise ñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepi yande Yar secoi.

³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi.

³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tũpa iyavei ndipoi eté ambuae.

³³ Iyavei yasaisura Tũpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaisura ava yande yeaisu nungar. Ahe ité aviye catu mbahe seropovẽhepri sui iyavei opacatu porerecosa sapĩpri tẽi sui —ehi.

³⁴ Evocoiyase Jesús icuase co ava pihãñemoñeta tupri sa, aipo ehi chupe:

—Namombrĩmi ereico Tũpa mborerecuasa sui —ehi.

Ipare ndipo iri oyemonguerẽhi vahe oporandu vahe rã mbahe rese yuvireco chupe.

¿Ava suindar pĩha Poropĩsirosar?

³⁵ Jesús oporombohese tũparo pipe aipo ehi:

—¿Mahera ru Moisés porocuita rese oporombohe vahe: “Poropĩsirosar David suindar ité” ehi yuvireco?

³⁶ Esepia, David ité aipo ehi Espĩritu Santo pĩratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarẽhimbar nde povrive yuvireco’ ehi David aracahe.

³⁷ ¿Mahera ru, “Poropĩsirosar David suindar sec-oira” peye, David teieté, “Che Yar” ehise chupe? —ehi.

Ava rehĩ oquerẽhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuaita rese oporombohe vahe sui. Es-epia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco.

³⁹ Oseca avei tenda porañete catu vahe güenara otũparo pipe yuvireco yepi, iyavei carusave tenda aviye catu vahesave uguapi yuvireco yepi no.

⁴⁰ Iyavei cuña imer mano vahecuer rēta virocua-rocua tēi ichui. Oarondaguã tēi avei oyerogui pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi.

Cuña imer mano vahecuer porerecosa

⁴¹ Ñepi ari Jesús uguapi oĩ porerecosa rĩru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco.

⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe.

⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi rĩru pipe.

⁴⁴ Ambuae ava eta rumo uguarepochi rumbĩrermi tēi omondo oporereco ãgua yuvireco; co cuña rumo oparaisusa pipe opa ité omondo uguarepochi —ehi güemimbohe upe.

13

“Imondurusara tũparo guasu” ehi Jesús

¹ Jesús osẽse tũparo guasu pĩpe sui, ahese ñepei semimbohe aipo ehi chupe:

—Ore mbohesar, jesepia oĩ ita imopuhapĩ, icatupĩ ai! —ehi.

² Jesús rumo omboyevĩ chupe:

—¿Pesepia co oĩ tuvichá vahe ité? Ndipoi chietera rumo que ñepei ita oyeha vĩte vahe; opacatu ité imondurusara curi —ehi.

Cañi renonde mbahe oime vaherã

³ Evocoyase Jesús yuvĩraso ivĩtrĩ Olivo ve, ahe ivĩtrĩ tũparo guasu rovai tupĩ. Aheve Jesús oguapise oĩ, Pedro, Santiago, Juan iyavei Andrés oporandu co cotĩmi mbahe rese yuvĩreco chupe:

⁴ “¿Mbahese vo aipo mbahe yavĩyera? ¿Mbahe poromondiisa rese rane vo icuasara?” ehi.

⁵ Jesús rumo omboyevĩ chupe: “Peicua catu, peyembopa ucai rene ambuae ava upe.

⁶ Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvĩreco.

⁷ “Pesenduse rumo ñehesa vavasa resendar cohave, iyavei que rupi, ndapeyembosiquiyeyi chietera. Esepia niha, ãgüe ehi rane itera; ndehi vĩtei chira rumo ari cañi.

⁸ Esepia, ñepei ivi pĩpendar ovavara ambuae ivi pĩpendar rese oyeupe yuvĩreco; iyavei oimera ivi rirĩ opacatu-catu tẽi tecua rupi, tiavor avei. Co rumo omboipĩ ramomira mbahe tẽi porarasa.

⁹ “Peñearo catu. Esepia, pe rerasora mborerrecuar rovai yuvĩreco, iyavei pe nupara tũparove yuvĩreco. Pe reraso aveira mborerrecuareta rovai,

iyavei mborerecuar ivate catu vahe rovai che recocuer sui tēi yuvireco. Ëgüe peyera peñehe che recocuer rese chupe.

¹⁰ Cañi renonde rumo co ñehesa pĩsirosa re-sendar opacatu rane ité ava upe icua ucasara ivi rupi.

¹¹ Iyavei, ‘¿Mbahe pĩha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecua Tũpa pe ñehe ãgua pẽu. Esepia, ndahei chira peyesui tēi peñehe, Espĩritu Santo ité oñehera.

¹² Ipare rumo ava omondoñora vivri yamotarẽhisar upe ‘toyuca yuvireco’ oya. Ëgüe ehi aveira ava guahir upe; tahir avei oyamotarẽhiñora oyesupa yuca uca ãgua yuvireco che recocuer rese.

¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipĩsiropri yuvirecoira.

¹⁴ “Tũparo guasu maranehi pipe pesepiase mbahe-mbahe tēi aposa —acoi oyeroqui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco.

¹⁵ Acoi güeta harive secoi vahe, ahe ari toi que iri eme güetave mbahe renose ãgua.

¹⁶ Acoi que rupi tēi secoi vahe, toyevi eme avei güetave oyeaosa renose ãgua.

¹⁷ ¡Iparaisu itera cuña ipuruha vahe ahe ari pipe, imembi pĩtani vahe avei!

¹⁸ Peporandu Tũpa upe, toime eme co nungar mbahe sõhisa vahe pipe pẽu.

19 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar.

20 Iyavei yande Yar nomombituhise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

21 “Que oimese aipo ehi vahe: ‘Esepia, co Poropisrosar secoi’ ehi, anise, ‘Peve secoi’ ehise yuvireco pëu, aní chira peroya aipo ehi vahe.

22 Esepia, yugüerura ava, ‘Che Poropisrosar aico’ ehi tēi vahe, iyavei, ‘Che amombehu vahe Tūpa Ñhengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroyasar.

23 ¡Peicua catura! opa aipo co senondeve amombehu pëu” ehi.

Mara ehira Tūpa Rahir oyevisē

24 “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira,

25 yasitata avei opara oviapi iva sui, iyavei iva resendar mbahe oririira yuvireco.

26 Ahese che, Ava Riquehir, iva quiha rese ayecua itera vitu che pīratasa pipe che rendigüer porañetesa pipe avei.

27 Ipare amboura che rembiguai eta iva pendar. Ahe evocoyase omonuhara opacatu ivi rupindar che rebiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cõimi ari sacu vahe yepota ãgua yandeu yepi.

²⁹ Na ehi aveira niha pẽu che ñehe rupi tupri mbahe pesepiase. Sese peicuara che, Ava Riquehir, cõimi eté che yevi ãgua.

³⁰ Supi eté yuvirecove vitera ava osepia vahe, co mbahe opase yaviye.

³¹ Iva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi ãgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rãrora peye. Esepia niha, ndicuasai che yevi ãgua.

³⁴ Inungar que mbia amombri oso pota ãgua renonde, güembiguai oseyapa güêta rãro ãgua, omondo avei ñepi-pei upe iporaviqui ãgua, iyavei omondo güêta roquendipi rãro ãgua.

³⁵ Pe evocoyase pemahemohara. Esepia, ndapeicuai marase che oi yar ayevira pẽu, aviyeteramo pĩtu ramose, pĩtu mbiter, tacura ñehese, anise añihivei.

³⁶ Ndaipotai pemahemohaẽhiseve tẽi ayevira.

³⁷ Che aipo ahe pẽu, opacatu upe avei: ¡Pemahe-mohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirío ari judío Pascua pieta ãgua ipane, ahe pieta pipe yuvirohu pan ndayapepoi vahe

yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco.

² Ambuae rumo aipo ehi yuvireco:

—Ndiyai pieta pipe ité yaipisi ava rehi yemondiêhi ãgua yandeu —ehi.

Cuña Jesús rese mbahe sãcua vahe oipiyere

³ Ahese Jesús secoi Betania ve Simón lepra vireco vahecuer rêtave. Aheve mesave chini-seve, cuña güeru mbahe sãcua vahe siru reseve sepí iteanga vahe. Ahe osovapisa rerocua, ipare oipiyere Jesús ãca rese.

⁴ Ambuae ava aheve yuvinoi vahe rumo oñemoiro tẽi aipo ehi yuvireco oyeupe:

—¿Mahera vo co omocañi tẽi mbahe sãcua vahe?

⁵ Omondo vahe ité tie co tresciento ari rupindar mboraviqui repri rupi ava iparaisu vahe pĩtivii ãgua viña —ehi yuvireco.

Omañeco tẽi avei ahe cuña yuvireco.

⁶ Jesús rumo aipo ehi ahe ava upe:

—Teheni, ãgüe tehiño, ¿mahera vo pemañeco tẽi? Co mbahe oyapo vahe rumo cheu aviye ité.

⁷ Ava iparaisu vahe niha yuvirecoiño itera pe pãhuve, iyavei peyapoño itera mbahe aviye vahe peyapo potase chupe; che rumo ãgüe ndahe viteñoi chira vichico pe pãhuve.

⁸ Iyavei co cuña oyapo mbahe ocatugüer rupi; opa voi omoiacua che rete che manoêhi viteseve.

⁹ Supi eté aipo ahe pëu: ñehesa pĩsirosa re-sendar mombehuse opacatu tecua rupi, imombe-husa aveira co cuña rembiapo sese mahenduha ãgua —ehi.

Judas oyemoingatu Jesús mondo ãgua yamotarẽhimbar upe

¹⁰ Evocoiyase Judas Iscariote, semimbohe doce vahe pãhu pendar, oso pahi eta rerecuar upe imoñeta Jesús mondo ãgua.

¹¹ Senduse, oyembovĩharete: “Yamondo guarepochi chupe” ehi voi eté yuvĩreco. Evocoiyase Judas oseca voi Jesús mondo ãgua yamotarẽhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pĩpe, ahesa avei ovesa Pascua resendar yucapri seropovẽhesa yepi, ahe ari pĩpe semimbohe oporandu Jesús upe yuvĩreco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pĩpe i. Supi pesora,

¹⁴ seiquesave aipo peyera sêta vahe upe: ‘Ore mbohesar oporandu: ¿Uma oi pĩpe vo Pascua pieta resendar orohura che remimbohe reseve? ehi’ peyera.

¹⁵ Evocoiyase ahe omboyecuara oi guasu ivatendar imoingatupri pẽu. Aheve pemoingatu mbahe yahu vaherã —ehi güemimbohe upe.

¹⁶ Evocoiyase semimbohe yuvĩraso tecuave. Aheve semimombehu rupi tupri osepia mbahe yuvĩreco. Ichui omoingatu carusa Pascua pieta resendar yuvĩreco.

17 Pĩtu ramomise, Jesús doce güemimbohe rese aheve oyepota yuvıraso.

18 İyavei ocaruse ité mesave yuvınoi, güemimbohe upe aipo ehi:

—Supi eté aipo ahe pẽu: ñepei pe pãhu pendar yande piri ocaru vahe che mondora che amotarẽhimbar upe —ehi.

19 Evocoyase semimbohe ndoyembovıhai tẽi yuvıreco, iyavei oporandu-randu tẽi ñepei-pei chupe yuvıreco:

—¿Che pĩha? —ehi yuvıreco.

20 Omboyevi rumo güemimbohe upe:

—Ñepei eté pe pãhu pendar ahe co omoaqui pan che caro pipe.

21 Supi eté che, Ava Rıquehir, amboavıyera icuachiapri; iparaisu catura rumo acoi mbıa che mondosar! Avıye catura ahe mbıa ndoyesuisse viña —ehi.

22 Yuvırocaru vıteseve, Jesús oipısi pan, “Avıye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipısi; co che rete —ehi.

23 İpare oipısi igua rıru, “Avıye ndeu” ehi Vu upe. Aipo ohe pare omondo güemimbohe upe, ipare opacatu yuvıroiıhu.

24 Ahese aipo ehi:

—Co che ruvi, ahe che Ru remimbotar ipıasu vahe pẽu nara. Oyepıyerera ava rehi recocuer rese nara.

25 Supi eté aipo ahe pẽu: ndaıhu iri chietera uva rıcier cheu arı oyepotase voi che Ru Tũpa mborerecuasave aıhura uva rıcier ipıasu vahe —ehi.

*“Pedro, ‘Ndaicuai vahe evocoi mbia’ erera cheu”
ehi Jesús Pedro upe*

²⁶ Osapucaire, opa yuviraso ivitri Olivo ve.

²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi.

²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pĩtu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi—ehi catuño ité chupe.

Ambuae opacatu aipo ehi tupri tẽi avei yuvireco chupe.

Jesús oyeriqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapri cohove, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambovihai eté oico

³⁴ aipo ehi:

—Che cūrīteĩ ndavĩhai eté. Esepia, che hã oyandu ité manosa. Pepĩta rane cohave, iyavei pemahe-mohara pe yeroquĩ pĩpe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaĩvi ivĩ rese oso, oporandu Tũpa upe mbahe tasi vahe reimeẽhi ãgua oyeupe.

³⁶ Oyeroquĩ pĩpe aipo ehi: “Che Ru, che rembiaĩsu, ndeu niha mbahe ndayavai vahe ité: che renose co mbahe-mbahe tẽĩ sui eve; tayapo eme che remimbotar tẽĩ, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuvĩroque yuvĩrocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepeĩ hora nde ropesiĩ upe?

³⁸ Pemahemoha, peyeroquĩ mbahe tẽĩ pĩpe pe viapiẽhi ãgua. Pe niha pequerẽhi ité viña, pe retecuer tẽĩ rumo nĩpirataĩ pẽu —ehi.

³⁹ Ichui oso iri oyeroquĩ, aipo ehi tuprĩ avei oñehe.

⁴⁰ Ipare oyevise, osesapiha iri iqueseve tẽĩ avei. Esepia, sopesiĩ nomboyeroyai eté yuvĩreco, ahese ndoicatui eté iñehe mboyevi yuvĩreco.

⁴¹ Imombosapĩsa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Rĩquehir, mondo ãgua ava yangaipa vahe povrĩve.

⁴² Pepũha, yaso. Esepia, cõimi eté che amotarẽhisar upe che mondo vahe rã secoi —ehi.

Jesús ipĩsisa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco.

⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi.

⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovinose oquise pucu. Ipipe oyasia pahi rerecuar ivate catu vahe rembiguai nambi.

⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye.

⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgüe peye icuachiapri mboaviye ãgua cute —ehi.

⁵⁰ Ahese semimbohe oñemosai pa oseya Jesús ahe ae tupri imoha yuvireco.

⁵¹ Mbia chĩhivahe rumo turucuar pipe güerañomi oñemama vahe supive secoi viña;

⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

53 Evocoiyase Jesús vîraso pahi rerecuar ivate catu vahe rovai yuvîreco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no.

54 Pedro avei amombri rupive tēi oi que ité oso pahi rerecuar ivate catu vahe rēta āchisa pipe. Aheve oguapiño mbia sundao pāhuve tata ipive oyepehe oĩ.

55 Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vahe rā Jesús rese yamotarēhisave yuca uca āgua yuvîreco; ndoicatui eté rumo yuvîreco.

56 Iyavei setá iteanga tēi semira yuvîreco sese; oyeecopi-copi tēi rumo güemira pipe.

57 Amove aipo ehi tēi yuvîreco seco momara āgua:

58 —Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi arí rupi opara amopuha. Ndahe iri chira evocoiyase ava tēi rembiapo’ ehi —ehi tēi yuvîreco chupe.

59 Ndahoyoyai rumo ambuae imombehusa rese.

60 Ahese pahi rerecuar ivate catu vahe opūha oporandu Jesús upe:

—¿Nderemboyevii chira vo iñehe yuvîreco chupe? ¿Mbahe vo aipo nde amotarēhimbar oñehe nde rese? —ehi chupe.

61 Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tūpa imboeteipri Rahir? —ehi.

62 –Taa, ahe ité niha che aico. Pe niha che repiara peye che, Ava Riquehix, aguapise che Ru mbahe mboavaisarēhi acato coti; ayevice avei iva quiha rese curi –ehi chupe.

63 Evocoyase pahi rerecuar ivate catu vahe omondoro oturucuar aipo ehi:

–¿Mbahe iri vo yande yaipota vite yaico?

64 Yasendupa niha aipo Tūpa upe iñehe-ñehe tēisa, ¿mara ehi aipo evocoyase pe pihave? –ehi.

Ipare opacatu guasu ava, “¡Tomanoño ité!” ehi yuvireco chupe.

65 Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

–¡Eicua ité ru, ava evocoi ocua nde rese! –ehi-ehi yuvireco chupe.

Sundao tūparo rārosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

66 Pedro ivive ñachimbrí pipe secoi. Aheve cuña oyepota ou pahi mborerecuar ivate catu vahe rembiguai chupe.

67 Osepiase Pedro iyepesehese tata ipive, omahengatu ohā sese aipo ehi chupe:

–Nde avei acoi Jesús Nazaret pendar rupindar ereico –ehi.

68 Ahe rumo aipo ehiño:

–Ndaicuai vahe ité rumo aipo mbia; ndaicuai avei aipo nde ñehesa –ehiño chupe.

Ichui osēse oquendipive ohā, ahese oñehe tacura.

69 Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndaheí eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñhe imoñuviriosa rupi. Ahese Pedro oyemomahenduha, “Tacura ñehé yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cōhe potase, pahi eta rerecuar, judío rerecuar, Moisés porocuaíta rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco.

² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviñehi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehéi eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pñha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepei ava soquendapri renose ãgua Pascua pieta pipe ava rehi porandusa rupi yepi.

⁷ Mbia Barrabás serer vahe, ahe pipeve avei soquendasa yuvireco ambuae oporapichi vahe reseve.

⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco.

⁹ Pilato rumo aipo ehi:

—¿Peipota amose vaherã judío rerecuar? —ehi.

¹⁰ Esepia, Pilato oicuaño ité ava rese yemoecatêhisa pipe sui pahi eta rerecuar remimondo secoise.

¹¹ Pahi eta rerecuar rumo ‘Barrabás tosê’ ombohe ati-ati uca ava yuvireco.

¹² Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyeví Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborerecuar rêta sui ambuae oi pipe, aheve opacatu omboetasa omonuha yuvireco.

17 Aheve omboyemonde turucuar pĩraumbi vahe pipe yuvireco, ipare yu piapri omonde ñaca rese.

18 Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

19 Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

20 Mara-mara tẽi sereco pare, ovirocua iturucuar pĩraumbi vahe yuvireco ichui, ahese omonde iturucuar ité yuvireco sese. Ichui vınose ocarve yatica ãgua yuvireco.

Jesús yaticasa curusu rese

21 Ñepe mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosĩ curusu co Jesús vireco vahe rese” ehi voiño tẽi yuvireco chupe.

22 Jesús oviraso Gólgota serer vahesave yuvireco (‘Ava Ñca Cangüer’ oyapave aipo ehi).

23 Iyavei uva ricuer oyeseha vahe mirra rese omondo tẽi yuvireco chupe. Ahe rumo ndoihui eté.

24 Evocoiyase oyatica yuvireco. Ipare sundao iguayĩño Jesús turucuar rese ‘¿uma pĩha vırasora oyeupe’ oyapave yuvireco.

25 Ahe oyatica añihivei la nueve rupi yuvireco.

26 Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ.

²⁷ Supive avei yaticasa ñuvirío imonda rai vahe ñepei mbahe rese ipocosa coti, ambuae mbahe rese ipocoẽhisa coti.

²⁸ Ëgüe ehi imboaviye icuachiapri aipo ehi vahe: “Ava mbahe-mbahe tẽi aposar nungar ipãhuve serecosa” ehi.

²⁹ Acoi ava ñocuasar iñehe-ñehe tẽi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipare mbosapi ari rupi opa irira amopuha” ere acoi cuese.

³⁰ ¡Eñepisiro ru nde ae cute; egüeyi curusu sui! — ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuita rese iñehe mara-mara tẽi yuvireco chupe, aipo ehi yuvireco oyeupe:

—Oipĩsiro ambuae. Ahe ae rumo ndoicatu oñepisiro.

³² ¡Poropĩsirosar Israel rerecuar guasu, toyeeroyi ahe ae curusu sui cũritei, ahese voi seroyasara — ehi.

Iyavei supive yaticapri mara ehi-ehi tẽi avei chupe.

Jesús mano agüer

³³ Osupitise rumo mbiter ari, opa tupri pĩtu ivi rupi. Ëgüe ehi las tres rupi.

³⁴ Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoiyase ñepei imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toi hu’ oya:

—Ëgüe tehiño rane, ¿oura pñha Elías seroyi ãgua curusu sui? —ehi.

³⁷ Ahese Jesús sãse pñrata. Ipare omano.

³⁸ Aheseve tūparo asiasa turucuar ivate coti sui ovo tupri.

³⁹ Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chñhivahe catu vahe si iyavei ambuae cuña Salomé.

⁴¹ Co cuña eta yuvirecoiño vahe ité Jesús rupi, oipñtivi vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pñtu ramosé, ahe ari pipe oyemoingatu ava yuvireco ari mbituhusa upe nara yepi,

⁴³ ahese José, tecua Arimatea pendar, porandusa ivate catu vahe pendar, acoi Tūpa mborerecuasa osãro vahe oico, oquerñhisa pipe ité oique oso Pilato upe oporandu ãgua Jesús rehögüer rese.

⁴⁴ Pilato rumo oyepñhamondii tñi, “Omano” hese. Oñehe sundao rerecuar upe oporandu ãgua ‘¿marase vo ãgüe ehi?’

⁴⁵ Sundao rereciar omombehuse chupe, ahese omondo sehögüer José upe.

⁴⁶ Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi.

⁴⁷ María Magdalena iyavei María, José si, ospiaño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe siacua vahe Jesús rehögüer rese nara yuvireco.

² Iyavei añihiveive, yipindar ari semana pipe, oyepota Jesús ruvipave icatu ramosé yuviraso.

³ Aheve aipo ehi oyeupe yuvireco:

—¿Ava pīha co tehögüer rovapisa virocuara yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihāi,

⁵ yuviroiquese tehögüer ruvipave yuvireco, aheve osepia ombahe rese pocosa coti mbia chīhivahe, iturucuar pucu morochi vahe oguapise oī. Ahese cuña oyembosiquiye yuvireco.

⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer.

⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora

pe renonera Galilea ve. Aheve pesepiara mbahe che remimombehu rupi tupri' peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oririí avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi.

¹⁰ Ahe oso imombehu supindar upe. Ahe rumo oyaseho vite oviharēhisave yuvireco.

¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipape Jesús oyemboyecua iri ñuvirío güemimbohe upe ambuae güepiaca pipe peri rupi.

¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñehengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei.

¹⁵ Ipape aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico.

¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirã tēi yuvirecoira.

17 Co mbahe poromondiisa omboyecuara che reroyasar yuvireco: Che rer pipe omboyepera carugar ava sui. Oñehe aveira ñehesa ndicuasai vahe pipe yuvireco.

18 Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

19 Oñehe pare, yande Yar Jesús oso ivave. Aheve oguapi Vu Tūpa acato coti oĩ.

20 Semimbohe evocoyase opa yuviraso opacatu ivi rupi ñehesa pĩsirosa resendar mombehu. Yande Yar avei oipĩtivii, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739